





臺海見聞錄卷三

崇安 董天工



雜記

赤嵌筆談云朱文公登福州鼓山占地脉曰龍渡滄海五百年後海外當有百萬人民之郡今歸入版圖年數適符熙熙攘攘竟成樂郊矣

舊臺灣志云鳳山相傳昔年有石忽自開內有識云鳳山一片石堪容百萬人五百年後閩人居之又傳緬民墾田得石碣內鐫山明水秀閩人居之八字



池北偶談云明崇正庚辰閩僧一貫居鷺門即今廈門夜坐見籬外陂陀有光連三夕怪之因掘地得古甌背印兩圓花突起面刻古隸四行其文曰草雞夜鳴長耳大尾干頭銜鼠拍水而起殺人如麻血成海水起年滅年六甲更始庚小熙皞太和千紀九四十字閩縣陳衍盤生明末著槎上老舌一書備記其事至

國朝癸亥四十四年矣識者曰雞酉字也加草頭大尾長耳鄭字也干頭甲字鼠子字也謂鄭芝龍以天啓甲子起海中爲羣盜也明年甲子距前甲子六十年矣庚小熙皞寓

年號也前年萬正色克復金門廈門今年施琅克澎湖鄭克塽上表乞降臺灣悉平六十年海氛一朝盪滌此固國家靈長之福而天數已豫定矣異哉

臺灣土番種類各異相傳元人滅金人浮海避元爲颶風飄至又宋時零丁洋之敗遁亡至此者聚衆以居男女分配故番語處處不同明太監王三保舟至臺投藥水中令土番染病者於水中洗澡即愈又植薑岡山至今尚有產者樵夫偶見結草爲記次日尋之弗獲故道有得者可療百病



臺灣風土記云龍涎香傳爲鯨魚精液泡水面凝爲涎能  
止心痛助精氣以淡黃色嚼而不化者爲佳番子浮水取  
之價十倍不可多得按何喬遠名山藏云龍涎香出蘇門  
答刺國其國西有龍涎嶼獨峙南巫里洋之中羣龍交戲  
其上遺涎焉國人駕獨木舟伺採之每一斤值其國金錢  
一百九十二枚准中國銅錢九千文嘉靖三十四年下戶  
部取香百斤遍市京師不得下諸藩司採買部文至廣東  
臺司集議懸價每斤銀一千二百兩僅訪買得十一兩上  
進內驗不同姑存之亟取真者部文再至廣州獄夷囚馬

那別的貯有一兩三錢上之黑褐色密地都密地山夷人  
繼上六兩白褐色細問狀云黑者採在水白者採在山皆  
真不贗尋有密地山商再上通前共得十七兩二錢五分  
次年進入內辨驗是真許留用自後夷舶聞上供稍稍挾  
來市始定價每香一兩價百金龍涎之爲用也入香合和  
能收斂腦麝清氣雖數十年香味仍在得其真者和香焚  
之翠烟裊空不散或言涎沫有三品曰汎水曰滲沙曰魚  
食汎水則輕浮水面善水者伺龍出隨取之滲沙則凝積  
多年氣滲沙中魚食則化糞散於沙磧惟汎水者可入香



用又言魚食亦有二種海旁有花若木芙蓉春夏間盛開  
花落海大魚吞之若腹腸中先食龍涎花嚥入久即脹悶  
昂頭向石上吐沫乾枯可用惟糞者不佳六巡方十七謂  
余在臺曾得兩許其色黑土人謂為龍涎香不能辨其真  
贗也

臺灣志畧云水仙宮祀五像莫詳姓氏或曰大禹伍員屈  
平又其二為項羽魯班更有易魯班為梟者更屬不經或  
曰王勃李白按禹平水土功在萬世伍相浮鷗夷屈平投  
汨羅王勃省親交趾溺於南海李白粃視塵俗沈於采石

沒而為神理為近之凡洋中歛忽遭風浪危急不可保惟  
划水仙一事庶能望救其法在船諸人各披髮躡舷以空  
手作撥掉勢假口為鈺鼓聲如五日競渡狀即櫓傾舵折  
亦可破浪穿風疾飛抵岸其靈應如響亦甚殊絕

陸提萬正色將之日本無風抵一山暫息舟中七十五人  
有四人登岸探路見異類蛇首猙猙馳攫一人共噉之三  
人逃歸於莽中遇一泉人攜之登舟道妖噉人狀泉人曰  
往余舟至同侶遭噉惟余獨存以項間有雄黃一物不敢  
近耳衆喜曰吾輩有雄黃百餘斤因各把一握頃之蛇首



數百飛來將近不敢仰視逡巡而退

寧靖王傳

前明寧靖王名術桂字天球別號一元子太祖九世孫遼王後長陽郡王次支也始授輔國將軍崇正壬午流寇破荊州術桂偕惠王暨藩封宗室避湖中甲申京城陷莊烈帝殉社稷福王嗣立於建業術桂與長陽王入朝晉鎮國將軍令同長陽守浙之寧海縣乙酉夏浙西郡邑盡歸國朝長陽率眷屬至閩中術桂尚留寧海而鄭遵謙從紹興迎魯王監國時傳長陽入閩存亡莫測監國封術桂為長

陽王鄭芝龍據閩又尊唐王為帝建號隆武術桂奉表稱賀隆武亦如監國所封後聞其兄尚存已襲遼王術桂具疏請以長陽之號讓兄次子承之隆武不允改封寧靖仍依監國督方國安軍丙戌五月大兵渡錢塘術桂乃涉曹娥江奔避寧海覓海艇出石浦監國亦由海門來會同至舟山十一月鄭彩率舟師北來因芝龍與隆武不洽知越州不守監國出奔故遣迎之術桂與監國乘舟南下歲杪抵廈門而芝龍已先歸命北行矣是時鄭鴻逵迎淮王於軍中請寧靖監其師合芝龍子成功兵攻圍泉州經月



不下鴻逵乃載淮王與寧靖同至南澳值粵東故將李承棟奉桂王之子稱帝肇慶改元永曆寧靖因入揭陽永曆令居鴻逵師中月就所在地方支膳銀五十兩戊子春命督鴻逵成功師庚寅冬粵事又潰辛卯春寧靖仍與鴻逵旋閩取金門及成功取臺灣寧靖輒東渡就竹滬墾田數十甲以贍朝晡既而元妃羅氏卒遂葬焉戊午聞靖海將軍調集水軍樓船進討鄭氏諸臣燕雀處堂晏如也寧靖獨蒿目憂之常言臺灣有變我再無他往當以身殉癸亥六月 大師克澎湖二十六日鄭兵敗回寧靖謂姬媵曰

我之死期已至汝輩聽自便僉云王既能全節妾等寧甘失身王生俱生王死俱死請先賜尺帛死隨王所寧靖曰善姬袁氏王氏或云蔡誤也勝妾秀姑梅姐荷姐俱冠笄被服同縊於堂寧靖乃大書曰自壬午流賊陷荊州攜家南下甲申避亂閩海總爲幾莖頭髮保全遺體遠潛外國今四十餘年已六十有六歲時逢大難全髮冠裳而死不負高皇不負父母生事畢矣無愧無怍次日校役舁主人柩至寧靖視之無他言但曰未時即加翼善冠服四圍龍袍束玉帶佩印綬將寧靖王磨鈕印送交鄭克塽拜辭天



地祖宗耆士老幼俱入拜寧靖答拜又書絕命詞曰艱辛  
避海外總爲幾根髮於今事畢矣不復采薇蕨書罷結帛  
於梁自經且曰我去矣遂絕衆扶之下顏色如生越十日  
藁葬於鳳山縣長治里竹瀝與元妃合焉不封不樹妾媵  
五棺埋於魁斗山去其墓三十里時稱爲五烈墓寧靖無  
嗣繼益王裔宗位之子名儼鈐爲後時年七歲安置河南  
開封府杞縣見臺灣府志

題寧靖王齋壁

前太常卿沈光文勤縣人

脩得一間屋坐來身與閒夜深常聽月門閉好留山但得

羈棲意無嗟世路艱天人應共仰愧我學題蠻天工

寧靖王祠

舉人陳輝臺灣縣人

間關投絕域遺廟海之濱古殿山雲暮空堦野草春鷓鴣  
啼向客杜宇咽迎人自立千秋節英風起白蘋

過寧靖王墓

明經郭必捷

萋萋芳草憶王孫碧水丹山靜閉門吊月蟪蛄悲故府號  
風松栢泣忠魂一枝聊借猶堪托四海無家豈獨存歷盡  
艱辛逃絕域但留正氣塞乾坤

輓寧靖王

陳元圖會稽人



匿跡文身學楚狂飄零故國望斜陽東平百世思風度北  
地千秋有耿光遺恨難消銀海怒幽魂淒切玉蟾涼荒墳  
草綠眠狐兔寒雨清明枉斷腸

寧靖王墓

生員 盧九圍 臺灣人

周道不復振晉鄭豈堪依劇來要荒外聊思效採薇神聖  
膺天統薄海播恩威樓船忽飛渡原野蔽龍旂降藩知順  
命逝將安適歸愛此數莖髮謳吟自歎歎蒼天為之變白  
日歛其暉哀哉殉主難從容有五妃

輓寧靖王

董天工

綱常誰與立大義炳千秋時危懷激烈身殞姓名留

其二

飲盡心中血從容就義成數行臨絕語生死一何明

其三

為愛幾根髮艱辛四十年一朝從此訣勁氣壯坤乾

其四

明社已成屋精神不改初離離坟上草竹瀝是安居

五妃墓

巡臺御史張湄

瘞玉埋香骨未塵五妃青塚草長春雲寒孤島魂相聚直



抵田橫五百人

五妃墓

巡臺六十七  
御史

東風駘蕩天氣清載馳驄馬春巡行刺桐花底林投畔森然古墓何崢嶸路旁老人為余泣當年一綫存前明

天兵既克澎湖島維時臺海五烈皆捐生至今坏土都無恙誰為守護勞山精雲封馬鬣連衰草四圍怪石爭縱橫時聞鬼母悲啼苦想見仙娥笑語聲歲歲里民寒食節椒漿頻奠陳香羨滿目荒涼已感歎更聽此語尤傷情有明歲晚多節義樵夫漁父甘遭烹島嶼最後昭英烈頑廉懦立

蠻婦貞田橫從死五百皆壯士吁嗟乎五妃巾幗真堪旌

五妃墓六絕句

巡臺  
御史 范 咸

明亡已歷四十載死節猶然為故明荒塚有人頻下馬真令千古氣如生

天荒地老已無親肯為容顏自愛身遙望中原腸斷絕傷心不獨是亡人

君后相將殉社稷

指莊烈

虞兮未敢笑重瞳廟廷倘使增陪

祀臣妾應教祭享同

忍把童家舊誓忘

指福王

孝陵風雨怨蒼蒼芳魂若向秦淮



去正好乘潮到故鄉

明妃無命死胡沙青塚荒涼起暮笳爭比冰心明似月隔

江不用怨琵琶

壘壘荒墳在海濱魂銷骨冷為傷神須知不是經溝瀆絕

勝要離塚畔人

又三月三日祭五妃墓再成六絕句

又逢上巳北邙來宿草新澆酒一杯自古宮人斜畔土清

明可有紙錢灰

田妃金盃留遺穴何似貞魂聚更奇三百年中數忠節五

人個個是男兒

長恨丁寧數語餘從容猶自整簪裾却西便是埋香地三

女墳應近闔閭

越記闔閭葬女於邙西名三女墳今五妃墓去寧靖墓三十里

封題無樹一孤岑剩有兒童躑躅吟豈是五丁開蜀道却

緣望帝哭春深

華陽國志秦惠王許嫁五女於蜀蜀遣五丁力士奉迎蛇山崩同時壓殺蜀王痛傷

命名曰五婦塚

可憐椎髻文身地小字羣傳紀載新轉眼燕京翻泯滅英

風獨顯費宮人

十姨廟已傳訛久參昴還應問水濱此日官僚為表墓五



妃直可比三仁

輓五妃

董天工

吁嗟乎自古賢媛多節烈何當五命同嗚咽丹心赤血飲  
爲誰視死如歸甘訣絕聞道

天師克澎湖燕雀滿堂盡晏愉君王獨立依誰護侍女追隨  
祇歎訐地老天荒生命迫兩姬三妾真巾幗死生願共應  
聲齊含淚請先賜尺帛北邙荒塚何冤冤陌上行人爲悲  
哀月朗幽魂歡笑語夜窺疑是碧雲堆於今歲歲清明節  
里老追思釀酒啜赫赫豐碑爲表揚

六范兩巡方爲立碑

莫愁上國

聲名滅噫嘻有明晚節多崢嶸南八男兒有婦貞化石冰  
心凌露冷香閨烈魄允堪旌

姚總制傳

姚啓聖號憂菴浙江紹興人康熙癸卯以漢軍籍登鄉薦  
第一初任香山知縣以誑誤去甲寅耿逆作亂

朝廷知其有幹濟才起爲台州郡佐尋擢溫處道十五年隨  
和碩康親王入閩爲福建布政使時海氛未靖啓聖每自  
備衣糧募壯勇有澄清海外之志嘗曰

國家聲教無外今逆藩雖已削平而以臺灣一彈丸厯



宵旰憂使沿海居民不遑寧處罪將誰歸會總督郎廷相罷去以啓聖代之於是得爲所欲爲而平臺之計決矣十八年移駐漳州漳與臺邇間諜可施乃大開招來館使隨征叅議道黃性震董其事賊降者無真僞皆納之高宴華軒焜煌於道令福州同知蘇良嗣督造戰船委隨征同知林昇督糧運旣數月賊稍有降者即厚賜與寵以禮貌使聞者心動先是僞將軍朱天貴來歸啓聖知其勇且熟海道諳賊形勢特疏請朱天貴叅軍事至則引入帳中相與卧起器用供帳侈於自奉天貴感激竭誠致命得其死力遂

增置火炮軍器買上游米石以圖大舉會蘇良嗣戰船亦報竣乃夜馳三百里至閩安鎮之五虎門親自配舟調遣精鍊水師隨又赴漳使興化知府卞永譽泉州知府張仲舉往說賊降而僞行人傳爲霖雖約爲內應實心持兩端及爲霖見殺乃作急遽狀從數騎招搖城市見大屋輒扃之榜其門曰某鎮公館某將軍行臺各盛陳供具得賊偵則佯曰若非某將軍人乎歸語而主某日之期不可爽予酒食遣之歸得他偵亦如之海上喧傳自相猜忌繼踵納款鄭氏心腹皆人人自危矣十九年二月癸未乘賊懈遣



兵攻破陳洲馬洲觀音山石碼等十九寨甲申復遣隨征  
遊擊張定國都司張璽等引兵直抵海澄城下招偽總兵  
蘇侃爲內應攻拔之降其衆二千二百六十七人遂復海  
澄是夜遣隨征知縣黃金從等乘潮分渡直入海門等處  
降其偽統領鄭元堂偽都督黃瑞偽將軍陳珍偽總兵張  
雄偽將軍張治等水陸兵一萬二千八百八十一人丁亥  
遂復金門廈門賊勢窮蹙退保澎湖二十年啓聖自以北  
人乘舟終非素習軍中不可無帥具疏上請

天子以內大臣伯施琅爲水師提督既至與之籌兵料敵經  
畫方畧於二十二年六月乙酉從平海進兵癸巳克澎湖  
七月丙申鄭克塽率衆歸誠海外悉平啓聖制閩數載前  
後議勦臺灣獨握勝算一切文移條教悉出已手雖溽暑  
盛寒不倦每有議論指授英氣激發義形於色遇有功將  
弁及降將皆開誠獎勵捐金宴犒無少恡惜推功讓能勞  
謙不伐其定謀推轂亦一時之能臣也

靖海施侯傳

施琅號琢公晉江人明崇正時爲遊擊將軍及明亡閩粵  
事亦相繼敗琅挈家屬入海依鄭氏成功忌其能因讞執



身圖錄 卷三  
之會得脫遁歸家屬皆被害順治丙申制府李率泰薦授副總兵駐同安薄廈門賊壘擒其驍將數十輩所招降萬餘人晉同安總兵擢福建水師提督平金廈沿海諸島康熙六年以邊患宜靖疏請擣臺灣得

旨赴京面陳尋以議裁浙閩粵三省水師提督留京晉爵內大臣伯康熙二十年

朝廷從姚啓聖請特命琅征臺琅至閩選舟師練習三載以二十二年六月乙酉由銅山進兵入八罩直抵澎湖澎爲臺門戶賊之精銳悉在焉有衆二萬餘艘二百餘集於雞

籠等嶼僞鎮國公劉國軒亦擁精兵二萬屯於風櫃尾牛心灣等處環設砲城以陸兵守之其餘沿海賊舟星羅碁布琅令大小船於風帆上大書坐將姓名以知進退定賞罰丁亥昧爽鼓角喧騰兩師將合琅先令曾成藍理吳啓爵張勝許英阮欽爲趙邦試七艘衝鋒破浪直入賊師焚殺無遺值潮自南至前鋒爲急流分散賊艘復合琅知其深入挺身衝殺賊艘收入八罩獨駕小舟潛偵賊寨動靜癸巳與各鎮誓師分爲八隊每隊七舟各三其壘琅自統一隊居中調度留八十餘舟爲後援又分遣五十餘舟從



東畔時內截寇歸路以五十舟從西畔牛心灣內外斬爲  
疑兵牽制忽北風驟發勢相逆三軍股栗琅巡師大呼曰  
無畏惟天惟

皇帝之靈實式臨之須臾雷震風反將士賈勇而前賊舟發  
火矢交攻烟焰迷天官兵乘勢夾擊自辰至申賊艘被焚  
覆溺投水者無算劉國軒遁入小舟從吼門出僅以身脫  
既破澎湖琅思以恩信結臺人凡降僞鎮營弁獎賞有差  
給士卒糧米焚傷覆溺未死者以醫藥救治之有欲歸見  
妻子者給舟送之降卒相謂曰是直生死而骨肉也歸相

傳述賊眾解體望 王師如時兩方駐師澎島時士卒數  
萬乏水隨地鑿井甘泉湧出於是軍聲大振鄭克塽始決  
計歸順遣裨將馮錫珪陳夢煒齎獻延平王金印一招討  
大將軍金印一公侯伯將軍銀印五來乞降時七月二十  
七日也八月壬子琅統舟師臨臺地受降令人民土番薙  
髮官民有讐怨者悉爲捐釋撫殘孽籍府庫兵仗卹陣亡  
之殺傷者雞犬不驚壺漿載道捷書至闕

上解所御龍袍馳賜載褒以詩加授琅爲靖海將軍封靖海  
侯予世襲琅復念海外初平所在土番雜處爲善後計特



疏詳陳臺灣棄留利害請設郡縣以爲東南數省藩籬  
詔報可版圖式廓海波不揚江浙閩粵四省數十年鯨鯢  
久靖琅之功爲多

施都督傳

施世驃琅子初以外委守備隨父戰澎湖有功後累官至  
水師提督駐廈門康熙六十年朱一貴倡亂世驃聞變集  
諸將議曰臺寇猖獗六七日全郡俱陷此非小賊也今臺  
灣數百艘逃入內地脫有奸徒混跡乘虛鼓煽厦島一搖  
勢不可制咎將誰執乃按兵觀釁而總督覺羅滿保羽檄

飛促世驃出師赴澎湖以慰衆心迨滿保至厦門而世驃  
已登舟出港兩日矣抵澎湖與南澳鎮總兵藍廷珍謀克  
復安平時朱一貴悉衆攻安平世驃與廷珍遣將分攻直  
搗臺郡朱一貴等後先就擒世驃即於軍中疏平臺郡狀  
值南風正駛捷書到闕

賜世驃東珠朝帽蟒袍異數有加時元兇雖擒餘黨散匿世  
驃復與廷珍分遣大兵廓清南北二路以除殘孽會風雨  
大作屋瓦皆飛人民震動世驃終夜露立疾作卒於軍

陳復甫傳



陳叅軍永華字復甫泉之同安人父某科孝廉以廣文殉國難永華時年舞象試冠軍已補龍溪博士弟子員因父喪遂隨鄭成功居廈門成功爲儲賢館延四方之士永華與焉未嘗受成功職也其爲人淵冲靜穆語訥訥如不能出諸口遇事果斷有識力定計決疑瞭如指掌不爲羣議所動與人交務盡忠款居平燕處無惰容布衣蔬食泊如也成功常語子錦舍曰吾遺以佐汝汝其師事之成功旣沒鄭經繼襲以永華爲叅軍慨然以身任事知無不爲謀無不盡經倚爲重知其貧常以海舶遺之謂商賈儆此歲

可得數千金永華却不受強與輒遭風敗更與之亦然永華笑曰吾固知吾命窮徒損他人資無益臺郡多蕪地永華募人闢之歲入穀數千石比獲悉以遺親舊量其所需或數十百石各有差計已所存足供終歲食而已逮耿逆以閩叛鄭經乘機率舟師攻襲閩粵八郡移駐泉州使永華居守臺灣國事無大小惟永華主之永華轉粟餽餉五年六年軍無乏絕初鄭氏爲法尚嚴多誅殺細過永華一以寬持之間有斬戮悉出平允民皆悅服相率感化路不拾遺者數歲一日命家人灑掃廳事內設供具扃閉甚嚴日



齋沐具表入室拜禱願以身代民命或曰君秉國鈞民之望也今爲此實駭觀聽其若民心何永華曰此吾所以爲民也復嘆曰鄭氏之祚不永矣居無何告其家人曰上帝命吾宰茲郡將以明日往詰朝端坐而逝婦洪氏小字端舍同邑人賦質幽閒有齊眉舉案風晨興盥沐畢夫婦衣冠歛衽揖而後語尤長詞翰精筆札閨門之內切磋不異良友永華冗不暇給凡文移尺牘屬稿及丹筆批答多洪爲捉刀而措語字畫與永華無異人不能別子慶緯慶球

陳烈婦傳

陳烈婦者永華季女鄭經長子欽舍婦也欽舍甫弱冠性剛毅果斷遇事敢爲經愛任之先是鄭經幼好漁色多近中年婦人民婦爲經諸弟乳母者經皆通焉有昭娘者遂納爲妾有寵經妻唐氏無出昭娘首生欽舍當時流言昭娘假娠乞養實屠者李某子獨鄭經謂生時目覩不之信族人竊誹之未幾昭娘以衆嫉死矣逮耿逆變亂鄭經統舟師渡海駐泉郡志圖內向以欽舍守臺灣號爲監國監國居守裁決國事賞罰功罪一出至公即諸父昆弟有過不少假用是宗族多怨之及鄭經自廈門敗歸視監國處



分國事悉當益信其賢自是軍國事悉付裁決與精兵三千人爲護軍宗族益憚監國而含怨愈深矣會經疾遽亡未立後家人方治含殮經母董氏出坐幃中傳集各官聽讀遺命立新主逡巡未舉經諸弟白董氏先收監國印董氏命太監往取印欽舍不時與因訛傳監國率兵且至衆倉惶不知所出羣妾有和娘者即克塽母也曰監國必無是請往取之欽舍曰此印先君所授軍國繫焉向使一介傳命真僞莫據何可輕付和娘來固當持去遂隨和娘至喪次再拜董氏前納印董氏曰汝非鄭氏骨肉寧不知乎

欽舍未及對經弟羣起撻之欽舍笑曰撻我無足武我平日不避嫌怨守法不阿亦爲鄭氏疆土耳今日死生惟命何撻爲董氏命置旁室中不令出經諸弟又遣烏鬼往縊之烏鬼畏不敢前欽舍知不能生遂自縊死明日立克塽爲嗣克塽小字秦舍而移欽舍柩於門外別室董氏謂烈婦曰汝叅軍女也叅軍於國有大功汝居宅中當善視汝烈婦曰昔爲鄭氏婦今屠兒婦矣尚安居此柩既舉烈婦扶柩出人莫能阻至喪所晝夜哀啼不輟路人聞之莫不殞涕其兄慰之曰汝娘未媿盍存孤以延夫後不猶愈於死乎烈



婦曰他人處常妹所處者變也縱生孤孰能容之有死而已絕粒七日不死復雉經與欽舍合葬郡治州子尾海岸間婦幼習文史工書知大體實秉母教亡年二十既葬臺人士常見監國乘馬呵殿往來或時與烈婦並出容服如生導從甚盛人以爲神云

平朱一貴亂

康熙六十年春三月大雨如注瀨口有大牛冒雨奔騰下鎮城從大橋頭入海向大港而出小艇追之不及此不知爲鯉爲鯨爲水牛蓋兆鴨母之亂云夏五月朱一貴倡亂陷府治總兵歐陽凱副將許雲戰歿總督覺羅

滿保馳至廈門檄水師提督施世驃進兵南澳總兵藍廷珍統偏師援之六月施世驃藍廷珍復臺灣械朱一貴至

京師磔之秋八月十三日大風壞民居天盡赤

提督施世驃駐兵即城營

房傾倒港內船隻皆擊碎兵民多壓死

初狂民高永壽冒首傀儡山後有朱一貴者謀爲不軌鞠之無實杖逐回籍五十九年十月朔臺地大震民間訛言爲亂兆賊有杜君英者粵人也藉稱一貴在其家招集徒衆六十年四月十九日豎旗岡山奪沈塘軍器臺鎮歐陽凱遣遊擊周應龍討之賊搗埤頭敗應龍軍



於赤山千總陳元戰死二十七夜攻陷南路守將苗景龍被執遇害把總林富戰死守備馬定國自刎死五月朔賊擁衆攻府安平協鎮許雲率遊擊游崇功千總趙奇奉林文煌等引兵來援力戰俱死之臺鎮歐陽凱及遊擊孫文元守備胡忠義千總蔣子龍林彥石琳俱戰死遊擊劉得紫把總李茂吉被執茂吉罵賊不屈死之府陷是日北路營亦陷守將羅萬倉死之其妾蔣氏自縊以殉時三邑俱陷惟北路上淡水都司陳策孤軍自保阻遠初四日羣賊立飼鴨者朱祖冒一貴稱義王僭

號永和元年總督覺羅滿保十四日馳駐廈門檄水師提督施世驃南澳鎮藍廷珍赴澎湖討復滿保悉心調度發舟師萬七千人戰船五百餘艘適水漲丈餘駢進鹿耳門克復安平鎮時六月十六日也二十二日與賊戰鯤身賊却遊擊林秀等乘勝追入府治次南較場軍令嚴無敢犯民秋毫者郡民慶更生爭担粥挈漿以迎越日藍廷珍等至自西港軍於

萬壽亭二十三日提督施世驃行視郡中慰民疾苦遂軍於北較場二十五日



詔到諭賊就撫二十八日遣朱文等畧北路滿保又遣遊擊張駮會陳策於上淡水兼程而下夾攻一貴等一貴窘竄溝尾鄉民醉而縛之閏月獻俘軍門諸黨亦漸次就擒檻送

京師磔之惟王忠未獲八月十三夜颶風大作雨如注火光閃閃燭天發屋碎舟營盤傾倒官哨商漁船俱覆軍民溺死無算賊餘黨黃輝卓敬等復糾眾小岡山捕獲斬之臺灣平

雍正元年夏四月千總何勉獲逸賊王忠伏誅

辛丑之變羣賊俱已伏誅惟王忠潛匿年餘未獲巡臺御史吳達禮黃叔璥奏請勒限緝拿總督覺羅滿保以中營千總何勉竭力用命專委搜緝勉備歷險阻訪知踪跡獲其親信羽翼使為內應四月十四日夜擒王忠於鳳山解省正法事

聞授何勉福州城守右軍守備仍從優議叙隨陞北路營叅將頒給世職准襲兩世拖沙喇哈番

外島

琉球國在臺灣正東由大雞籠山水程四十三更稱為其東洋



身圖錄 卷三  
國王有三曰中山王山南王山北王深目多鬚有職事者以金銀簪爲差賤者髮束無簪土人結髻於右漢裔結於中俱用色布纏之紫黃爲貴紅綠次之青爲下衣則寬博廣袖腰束大帶貴者纏文錦無貴賤皆着草履見使者始具冠履婦人以墨鯨手爲花草鳥獸形不簪珥不傅粉足與男子同上衣之外更用幅爲帷周蒙背上見人則升之以蔽面下裳摺細而長不令足顯君臣上下各有等級文有大夫長史都通事等官專司朝貢之事武有法司察度邊關那霸港耳目等官分司刑名錢穀訪聞之事王則日三

視朝羣臣搓手膜拜遇

聖壽長至元旦王統衆官肅冕服高呼慶祝儀同內地土產則禾苧土絲紫菜魚螯龍蝦螺蚌熊虎豺豹鹿牛馬羊豕硫磺皮紙蜂蚌又有紙扇煙筒其製陋劣果品頗同中國獨不宜茶賦法頗似井田明洪武五年初入貢

國朝順治三年投誠請封以後每二歲一貢方物率以爲常其使艦恒被風飄泊至臺給船送福省云

日本古倭奴國亦稱東洋在臺海東北由大雞籠經關潼白叻水程五十九更至長岐或作崎長岐者日本互市地也有上



身附錄 卷三  
將軍主之王住京城去長岐遠極不干政事歷代止爭將軍無有爭王者其人好勇剛勁男子生則授一刀出入佩之有所爭輒攜以刺人隨自割其腹國法獨許殮自割者以其勇也屋地鋪厚褥入必脫履戶外物產金銀琥珀水晶硫磺水銀紅銅白珠青玉蘇木胡椒細絹花布螺鈿漆器鯨魚鮑魚子魚綿紙扇犀象刀劍之類首飾銀器極精又有烏金香爐酒瓶手釧等玩婦人美姿容不施粉着缺後朱履曰淺拖長岐有大唐街花街賈舶至則將人入土庫擇其貴者送以妓歸時計日算緡遺之最愛臺貨白青

糖鹿獐皮價倍他物至古蹟書畫又無價矣

日本入皆覆姓其單姓者

徐福配合之童男女也福所居之地曰徐家村其塚在指熊山下

呂宋在臺海東南船行由沙馬磯斜指巽方經謝崑山大小覆金山水程五十八更稱爲南洋其國甚小頗產黃金其人質樸爲紅毛所據與西洋人雜治之分其地爲二十四郡有化人巴黎共操其柄生女及笄必候巴黎按選姿色者留之色衰乃令出嫁男子將婚必赴巴黎跪聽呪法以毒油滴其額名曰淋水人死不葬昇置萬人坑中三年舉棄諸海西洋商貨多聚其市王自紅毛來者率數歲一易土



人蓬髮短衣跣足惟紅毛則具冠履着窄袖衣袴取包臀  
襪名沒大小言無大小皆能着也冠制如釵有職事者手  
持藤條鑄銀為錢每顆重七錢三分謂之大錢半其重為  
中錢通而輕之至一錢八分以至九分四分半者謂之菱  
子即今臺地所用番銀是也

咬嚼吧喇一作噶在臺海極西水程二百九十一更本瓜哇  
地紅毛奪之其初土人輕捷善鬪紅毛製鴉片烟食之遂  
疲羸受制竟為所據其人凡三種紅毛為貴中國寄居為  
唐人次貴土人為賤屋制高地覆板鋪藤花蓆跣跌而坐

王騎象或牛男蓬頭女椎髻上衣下悅西洋化人巴黎之  
屬與紅毛分持其柄嚴約紅毛及唐人無得吃鴉片犯則  
重罰不宥然唐人往往竊食私帶至臺物產金銀犀角象  
牙玳瑁青鹽檳榔椒香蕪木枕榔吉貝倒掛鳥綵鳩綠鳩  
紅綠鸚鵡白鹿白猿鑄銀為錢其豐脊與呂宋相似

西洋在西海外去中國極遠其人物目隆準狀類紅毛然  
最多心計又具堅忍之志析理務極精微推測象緯曆數  
下逮器用小物莫不盡其奇奧用心之深將奪造化之秘  
且能過目成誦終身不忘明季有來中國三年遍交海內



文士於中國書無所不讀多市典籍歸教其國人悉通文  
義創爲七克等書所言雖孝悌慈讓其實似是而非又雜  
載彼國事實以濟伊天主教之邪說今中國亦有天主堂  
扃閉甚密外人曾不得窺不耕不織所用自饒其國多產  
白金明時常歲運白金鉅萬轉送各郡邑天主堂又製爲  
風琴自鳴鐘刻漏渾天儀諸器皆巧奪天工其國富强紅  
毛密邇與之同類咬啣吧爲其兼并呂宋遠居東海亦爲  
所踞其心寧有厭足乎

紅毛即荷蘭又曰紅夷一名波斯胡在臺海極西實西洋

附庸也性貪狡能識寶器善貨殖重利輕生貿易無遠不  
至其船最大板用兩層謂之夾板其帆如珠網八面受風  
無往不順海洋相遇恒遭其劫惟廣南小船名軋船操檝  
飛行駕巨礮於上攻其船底底破即沉物產自鳴鐘水鏡  
眼鏡哆囉啤啤吱紗緞之類皆中國所不能製者

大崑崙在大海中去臺灣極遠與暹羅稍近其山最高且  
廣五穀不種自生果木繁植百草燉焉但空山無人明季  
海寇林道乾自臺遁去曾至此山見其風景特異欲留居  
之奈龍出無時風雨暴烈海浪掀騰舟不可泊竟其下爲



蛟龍窟宅乃棄去復之大年暹羅國名也在西南先年臺灣有老人  
經隨道乾至大崑崙尚能詳言之後鄭成功不安臺灣有  
卜居大崑崙之志咨訪水程風景甚悉會病亡不果行  
暹羅原暹與羅斛二國後併爲一稱暹羅國漢赤眉遺種  
在臺海極南水程一百四十一更其國方千里羣山環繞  
峭拔崎嶇地下濕土疎惡氣嵐熱不齊王宮壯麗民樓居  
藤蓆竹簟寢處其中鱷魚潛伏樓下伺人畜影攝入水中  
吞之向晚人必牽牛緣梯置樓上王白布纏首腰束嵌絲  
悅如錦綺跨白象或乘肩輿尚釋教國人效之好爲僧尼

僧善呪人有爲鱷魚戕害者訟諸僧即呪拘立至數其罪  
魚俯伏乃杖而放之婦人多智夫聽於妻妻與中國人私  
不爲怪婚則僧爲迎壻至女家僧取女紅貼男額稱利市  
喪禮貴者灌水銀葬民間烏葬言語大類廣東俗澆浮習  
水戰好鬪喜寇掠市用海貳煮海爲鹽釀木爲酒產寶玉  
奇香異木翠羽獅白象白鼠蘇木六足龜珊瑚地宜種穀  
多獲水長丈餘禾亦暴長出水不患淹明洪武間其王遣  
子奉金葉表朝貢後數年復貢象及方物永樂間遣使上  
表貢方物乞量衡式賜古今列女傳量衡令三年一朝貢



至

國朝猶朝貢以時尤足徵

聖化誕敷無遠弗屆云

安南在臺海正西秦屬象郡漢武帝平南越置交趾郡與  
滇南粵西相連後漢伏波將軍馬援征交趾立銅柱以分  
茅嶺爲界唐改曰交州自臺水程八十三更可至其俗喜  
鬪不解耕種明洪武遣使封其國王陳日烺賜以駝鈕塗  
金銀印乃入朝貢後爲權臣黎季犛所篡永樂五年詔求  
陳氏後立爲安南王人言陳氏無後乃郡縣其地宣德間

以交廣屢叛數勤王師從楊士奇楊榮之議遂棄之後封  
陳暲爲安南國王歲時朝貢暲死黎利詐以暲卒族人並  
絕共推利守國表請於朝許之黎氏遂據有安南俄爲莫  
氏所篡後黎寧逐莫又復國今其國王大抵黎氏子孫也  
其地產金珠珊瑚玳瑁丹珠沉檀朶奇楠諸香蘇合油胡  
椒羚羊角犀象兕白鹿猩猩狒狒白雉翡翠蚶蛇蟻子波  
羅蜜烏木蘇木境內有越王城天使館浪泊柱銅鼓自通  
貢以來中國人多入居之今其民人漢裔居多無男女長  
幼見漢人皆稱阿叔女子愛招漢婿婦人出而貿易丈夫



坐食於家好食檳榔人多黑齒衣服頗類琉球披髮戴篔筩跣足見尊長輒去其筩义手以為敬謂坐為卑謂立為尊以立高而坐下也能為軋船無首尾輕捷異常紅毛夾板船遇之立敗故不敢入安南凡有遠行挈家與俱康熙五十六年嘗有藤釘小艦飄風至澎艙中男女眷屬畢集自稱安南國大學士陳某因往莊收穀偶遭颶風飄流十餘日至此凡三年一朝為中國貢獻外臣

蘇祿在臺海東南水程由砂馬磯抵呂宋放船經文武樓山呂蒙山一百二十六更可至其俗山涂田瘠宜種粟麥

民食沙糊魚蝦螺蛤煮海為鹽釀蔗為酒織竹布為業土產竹布玳瑁珍珠甘蔗所居在海山小島築外木內石牆垣一道長二里許以作防守聚居不過千人無銀鐵使用率以布疋米穀相交易明永樂間其國王嘗率妻子酋長來朝歸過德州而卒後遂不通貢至

國朝雍正四年遣使龔廷綵泉州同通事賈表文方物入貢

乾隆五年有蘇祿番目烏人皆色爹船送被災泉人回唐并獻書水師提督興泉道代求

奏請來歲入貢遭颶風飄泊到臺官為咨送赴厦以上外島皆見舊志



使槎錄云明莊烈帝時工部尚書渭南南居益巡撫福建時紅毛以明月珠珊瑚樹異香火馬諸珍賄請互市公絕其使焚其貢物口占一絕云明月珊瑚貴莫言番書字字誰軍門牙前立下焚珠令不敢持將獻至尊授部將以方畧討之繫其酋高文律閩人立石平遠臺以紀公績今嚴禁互市實苞桑之至計爲國家計久遠者當視前明紅毛入犯中左肆行焚劫又復勾引劉香老首尾衝突海壖騷動雖竭力驅剿貫苦不支慎勿徂目前之近利而輕言互市也

終卷

臺海見聞錄卷四

崇安 董天工 典齋

臺灣賦

臺灣府學教授林謙光長樂人

有汗漫公子足騁八方目驚九鄙訪秦漢之故都登雲亭之舊時舒神於錢來丹穴之巔長嘯於渾夕脫扈之址洞庭彭蠡拍驚浪以颺飛弱水龍門鼓輕舸而容與歷吳越詡甲第之連雲入鄒魯羨絃歌之盈耳闐闐誼雜舉踵則觸乎輪轅都市紛華摩肩則炫乎羅綺自以爲穆王策駿之遊茂有尚於此儼然恃所觀而述於廓宇先生先生方



暴背鴻濛吸飲滄溟聆而哂之謂是尠丈夫也曰子亦曾  
曠爾矚遠爾盱而知

今皇帝之輿圖乎制萬國以侯尉垂一統於車書人弗敢私  
其尺土俗無不拱乎辰居奠神州而晏若厝六合而恬如  
暢餘威於殊俗沛異澤於遐區即跳梁以據險終痛悔其  
負嶠走也慶流波之既靜得專爲子頌臺灣之盛軌而勿  
遑及乎其餘懿夫滄浮滇沔沅瀆潰澗掀天震地吞谷排  
空駛如奔馬激如騰龍瀉碧千里湧浪萬重神鰲驅瀑石  
燕呼風颺颺颯颯颯颯颯颯颯颯颯颯颯颯颯颯颯颯颯颯

通爾乃以忠信爲舟以道德爲櫂爰縱纜於銅山泛一葉  
於厦浦飛廉戒途屏翳先路巨浸迴瀾狂濤息怒游泳虎  
井之灣滌洄牛心之澣望內塹而揚舲指西嶼而繫組旣  
憇足於澎湖復放櫂於深渚程僅歷於六更里倏越乎五  
百少焉神山突出沃野孤浮景呈異狀沙截洪流一崑連  
七崑而蜿蜒南崑偕北崑而阻脩大線扼海翁之堀北線  
接安平之洲衝鹿耳以抵岸陟臺灣而遠搜於是大岡小  
岡峽岿崑崔半崩半屏巉巖崑嶸鳳巒插漢以嶽嶽龜山  
負地而磅礴翠織觀音之峯丹銷赤崖之壑聳打狗於平



坡峙買猪於廣漠木岡凹底形若聯翩阿里雞籠勢相犄  
角玉筍璀璨則漾素影於波濤金鑛嶙峋則伏雷聲爲管  
籥計自南而訖自北繞以二十二重之溪由此界而溯彼  
疆隔以六千餘里之谷升高而眺循俗而詢厥地惟鹵厥  
土惟墳厥田惟上厥種惟糜厥草惟茂厥木惟困厥珍惟  
錯厥布惟芬厥鳥惟毳厥獸惟羣飛潛動植長盛紛紜嘉  
茲壤之沃饒矧温風之時至犬吠雪以爲常龍興雲而不  
曠卻溽暑於竹柳掃嵐烟於蘿薜刺桐飄經歲之絳霞齒  
蓄迎四季之夏氣歷選勝於炎方允莫京於海澨則有文

身番族黑齒裔蠻爛滿頭之花草拖塞耳之木環披短衣  
而抽簾作帶蒙鳥羽而編貝爲繫欣中國異人之戾止乃  
跳石越澗以來觀饋波羅之清冽獻嘉槎之甘酸蕉子剝  
來幾等木桃之贈黃梨摘露不殊葵藿之繁翹首瞻依幸  
彼俗之未陋跂足蠕動樂大化之可頒又有蓬跣方除膠  
庠初隸載酒問竒負經請諦吟誦半雜於博勞衣冠尚存  
其椎髻拱手於都講之庭側身於敷教之地斯時也名邦  
上客暫停輜軒廣布文德弘宣湛恩數討叛之故開並生  
之門示傲慢以秋肅導頑梗以春温譬木鐸之徇路若指



南之啓昏從此蜃氣晴嘘結陸離之樓閣鮫人晝卧展錦  
繡之乾坤謂非禹服重新涵侯甸要荒於一體堯仁遐被  
輯躬桓蒲穀以稱尊也哉汗漫公子伏而聽焉茫乎喪於  
懷來曰不觀滄海者誇溝壑之弘不觀王會者詫都邑之  
鉅鄙人乃知

今皇帝之輿圖未易以蠡測也請爲歌以比於雅頌之末爰  
起而系曰有土綿綿有水漣漣介在絕島吐霧吹烟

帝赫厥怒淵淵闐闐既昭義問乃命甸宣崇儒重道勿棄蒙  
顛匪棘其欲式廓厥埏

皇以涖之於萬斯年

平南賦

周 澎 晉江人

海氛煽虐數十年大將軍施公銜

命往征一戰而克平南奏疏一編乃都人士家謠戶頌積成  
卷軸者也雖里巷微詞而輶軒足採乃撫其事實而作賦  
曰繫

帝德之光華曰聖神而文武耀化日於中天颺仁風於率土  
賡一廷之都俞舞兩階之干羽張百旅之熊羆扶千屯之  
貔虎六服率賓萬方安堵靡不稽首來王翰賓天府惟是



東南一帶溟渤與區蛟鯨出沒陸梁逋誅依鼃鼉以窟宅  
聚蜃蛤而爲徒乘風濤以鼓鬣播毒燄於萑苻長使海濱  
黔黎毀家破室雲屯士旅抱戈枕戈嗟桑田之萬頃乃彌  
望而平蕪困頓魴於涸澤泣流紅於征途錯烽煙於野戍  
棲燐火於寒壚至於淒風鳴柝涼月啼鳥莫不含酸茹感  
惻愴嗟吁

天子乃念南國之化儻每殷勤而宵旰曰惟予股肱孰是伏  
旄秉鉞爲海邦剪此暴亂僉曰惟彼元勳夙膺寵眷俾控  
制以專征用克紆乎廟算

帝曰都自江以南倚女爲屏翰其克奏膚功以靖此多難於  
是分虎竹綰龍章辭禁衛出

帝鄉貔貅夾隊魚麗成行戈鋌的皪旌旆飛揚駐雄師於澤  
國若雨集而箕張惟其地當斥鹵井竭水漿喜甘泉之應  
禱供萬竈之餼糧乃脩艘艫爰戒舟航凌中流以擊楫攬  
形勢於滄浪先卜期以決勝奏神策於廟堂繫重淵之瀾  
漫慨風浪之不常望蜃樓之縹緲嗟欲濟之無梁因而畫  
沙爲隄聚米成島孰漂疾當其驚湍孰盤渦介其要道孰  
旁涯而可泊舟孰順流而堪直搗敵已在吾目中胥按圖



而可考定方畧於金城羨克國之計早知拉朽而摧枯胡  
險阻之能保爾乃乘機制變六月興師舳舻千里霄漢蔽  
虧劍氣干雲而烟爍甲光冒日而陸離橫驚波以伐鼓撥  
瘴霧以揚旗各星羅而棊布聽中堅之指麾因念蛟宮盤  
踞兔窟憑依旣蜂屯而蟻聚復扼險而負危雖投鞭之可  
斷匪制勝之機宜故毀軍以驕敵弄股掌之嬰兒彼乃疎  
汎守撤藩籬雖北來之軍旅豈渡江之能飛橫千尋之鐵  
鎖沉水底以何爲於是鼓輕橈浮彩蠲溯鴻波撼絕壁凌  
馮夷之宮搗潛虬之宅維時衝颺怒號狂濤湍激飛沫噴

空滂泮滌汨吞海岳以俱冥合水天而齊碧百族爲之震  
驚千靈爲之辟易天吳排浪以浮游罔象穿煙而蹙躡篙  
工柁師逡巡踈踏莫不輟權停橈驚心動魄爾乃精誠上  
格叱電驅霆飛廉頓轡屏翳潛形波臣歡焉助順海若剡  
其揚靈爰散金以誓士恥與敵而俱生復焚香以戒旅惟  
妄殺之是懲於是軍聲震士氣騰艤舳發枹鼓鳴搖赤羽  
麾青萍殲怪鱷殪毒鯨弓不虛發矢必應聲倒戈漂鹵流  
血波頰旣獻俘而授馘遂掃穴而犁庭乘長風以破浪藉  
專閫之威稜因而傾其巢剡其壘敗甲殘鱗俛首帖耳濟



藥石以扶傷俾瘡痍之咸起仗天威以縱擒使歸布其德音曰漏網之餘魂漫稱雄於井底將計日以成擒胡憑陵之足恃念薄海之含靈皆

朝廷之赤子無追踪於田橫五百人而俱死倘銜壁以來歸當茅土而錫爾惟公事之勾當何私仇之足恥彼乃藉戶口輸土田匍匐蟻伏稽首軍前曰南人不復反願稟朔於堯天知

聖朝之寬厚必罔治於厥愆若夫哀鴻失所瓊尾堪憐延頸企踵霓望久懸瞻王師之至止胥雀躍而歡顏陳壺漿而

塞野奉筐篚以周旋桑麻無擾井里依然耕不輟耒賈不易塵相與脫金鷲之苦登衽席之安更有流離遷客顛顛閨鬢弔天涯之魂影悲絕徬之風煙盼征鴻而帛書難繫吟夜月而笳拍空彈望鄉關於萬里長掩涕以流連欣撥雲而見日樂故土之生還乃復納叛招降編之部曲曰蔡人即吾人務推心而置腹彼坑卒於長平何徒肆其殘酷化鷹眼以咸馴各賣劍而買犢念勝國之宗支多竄身於窮谷懷禾黍之故都每悲歌而當哭彼白馬以賓王殷宗爲之不覆惟



聖世之芳規曠千春而並燭於是雕題貫胸之衆焦茵臬矰  
之倫迴首請吏願列編民遷情反志服教畏神固絕徼荒  
陬盡變為樂土何殊方異類共識乎尊親若乃威靈遠暨  
悉主悉臣陸警水慄奔走來賓琛幣重譯而交貢梯航接  
踵以並臻火齊木難之寶珊瑚璫瑁之珍烏集鱗萃靡不  
咸陳豈中朝特貴乎遠物乃遐方共聞有聖人由是統鼓  
傳干戈戢唱天山之歌勒燕然之筆交趾之銅旣標淮南  
之碑亦立捷音颺發於閩關露布星馳於北極六合莫不  
騰歡

至尊為之動色曰海波之載揚四十年如一日吁嗟乎蒼生  
不安於稼穡伏爾師貞一戰而克從茲惡氛除劫灰熄樂  
桑麻恬作息南顧紓憂云誰之力其速議褒封用彰彼勲  
德爾乃登

清廟播樂章告海邦之清晏慶社稷之靈長遂褒以絲綸之  
天語錫以黼黻之袞裳指河山而盟帶勵分茅土而勒旂常  
謂爾元戎邦國之光用錫爾鐵券爾其世守而永藏藉金  
城之萬里用屏衛此一方奠封隅以永固鞏奕葉於苞桑  
追伏波之舊烈曠百世而流芳於是居者相與慶於閭行



者相與歌於市胥朋酒以言歡賡吉甫之燕喜願長借乎  
衮衣沾化雨於桑梓若乃鈴閣餘閒左圖右史吐握下賢  
赤舄几几門多珠履之賓座滿縫掖之士同雅歌於祭遵  
等輕裘於叔子令既肅於秋霜心復澄於止水彼烟閣與  
雲臺知姓名之永紀備採風於輜軒詞徧騰於下里乃歌  
曰嗟滄海兮噴狂濤蛟龍鬪兮虎豹嗥兵車絡繹兮饋餉  
勞悲中澤兮聲嗷嗷孰提師兮奮旌旄麾霓虹兮掣寶刀  
淬龍泉兮礪鸛膏入蛟宮兮斬毒鼈斬毒鼈兮奠滄海吁  
嗟偉烈兮斗漢爭高

海吼賦

巡臺張湄  
御史

環臺皆海也自夏徂秋颶風屢作驚濤溢涌雷响電焯  
擊於鯤身厥聲迴薄遠近相聞莫不錯愕主人索居海  
濱形隻影寡潦積庭間雨昏爛熈起坐聽之晝夜不舍  
愴然罔然若置身壙垠之野有難乎爲懷者乃作海吼  
之賦其辭曰

繫天風之欲怒作地氣以先聲通呼吸而互應混上下而  
相成斜景黯其晝伏斷虹施以宵橫帆樯集島沙磧凌城  
鯨甲振厲鵬翼長征風搏九萬兮扶搖直上水激三千兮



不平則鳴爾乃炎蒸絺葛潤逼柱礎海若頻驚石尤頓阻  
猙颯颯以迴涼恠雨淫淫而去暑蕭梢林木聳萬壑之  
秋聲破碎虚空竟千村之社鼓其爲壯也輶輪四起蕩瀟  
八垠冰崖崩裂鐵騎羣奔縱金鏞於山谷擺雷礮於乾坤  
其爲駭也龍鼉馭還鼉負連屯天吳奮以叫號蚺像詭以  
游巡鬥饒蛟而水立哮虓虎而林昏於是經旬陰曠徹夜  
喧虺琳宮久闕貝闕沉埋飛滂霧積峻湍山頽嗟樓船之  
屑沒絕商旅之往來淼淼龍津浮萍蹤其何託啾啾鬼哭  
出魚腹而興哀則有域外孤臣天涯羈客長簟淒其短檠

蕭索枕繞瀑雷牕縈濤雪悵落葉於始波感吟蟲於將夕  
愁泛波之杳茫憶弄潮之夙昔徒撫影而徘徊或隨聲而  
嘆喏爲之歌曰風浙瀝兮動羅幃雨淋浪兮暑氣微長鯨  
吼兮水四圍夢魂驚兮不可歸望無極兮音塵稀指故園  
兮孤雲飛

臺陽八景

安平晚渡

臺灣高拱乾  
觀察

日脚紅彝壘烟中喚渡聲一鉤新月淺幾幅淡帆輕岸濶  
天暈暝風微浪不生漁樵爭去路總是畫圖情



又

笳聲互動日沉西一片蒼茫暮靄低夕照城邊催渡惡晚  
烟風裏裏帆齊水寒弄影光搖月潮長移舟浪拍隄却怪  
羣鴉棲不定參差樓堞望中迷

臺灣  
觀察莊年

又

樓堞參差噪暮鴉村氓喚渡語聲譁忽衝沙鳥暝煙破漸  
轉蒲帆夕照斜遠浦不須愁返棹晚風無事動悲笳寒潮  
乍退人歸後明月孤舟漾淺沙

臺灣  
刺史褚祿

又

高城極目勢蒼茫向晚歸人一葦航月淨波光浮遠白霞  
啣帆影帶昏黃參差樓閣迷雲樹掩映漁燈上女牆市井  
只今誇極盛可知濟渡賴津梁

彰化  
令陸廣霖

又

粉堞光搖日欲斜隔江呼渡鬧諠譁飛鳥泛水迎新月馳  
馬揚波噪暮鴉纜結千章迷綺樹檣懸十丈插荷花錦帆  
望裏橫收處簇簇歸人下碧沙

董天工

沙鯤漁火

高拱乾

海岸沙如雪漁燈夜若星依稀明月浦隱躍白沙汀鮫室



寒猶織龍宮照欲醒烹魚沉醉後何處曉峯青

又

莊年

一帶沙平水亦停漁舟鱗集傍遙汀寥天夜黑難邀月極  
浦燈紅若聚星網感熹微穿爝火波回歷亂盪流螢遠山  
欲看模糊甚近岫還留半朶青

又

褚祿

連岡相接聚沙汀掩映魚舟點點螢風定碧波明遠火光  
搖寒影落疎星莫疑滄海鮫人淚翻訝乾坤柳絮萍驚起  
蒼龍眠不穩欲燃犀角燭奇形

又

陸廣霖

高掛絲綸新月鈎沙汀隱現泊漁舟烟籠小艇連檣語風  
起孤篷一葉秋倒映水光星錯落斜聯螢火影沉浮銀燈  
合向銀河瀉絕似吳江古渡頭

又

董天工

一線鯤沙集萬篷晚來夜照滿江紅明星燦燦疑殘月螢  
火燐燐似彩虹影落波心金點綴光浮水面玉玲瓏且聽  
三弄梅花笛吹徹行雲耀太空

鹿耳春潮

高拱乾



海門雄鹿耳春色共潮來二月青郊外千盤白雪堆線看  
沙欲斷射擬弩齊開獨喜西歸舶爭隨落處回

又

莊年

桃花春漲浪如洑鹿耳門高勢更雄殊死千軍嚴被陣凌  
虛萬木怒號風破深不信纓猶盪沙走還知海欲東盛氣  
漸平羣籟寂恬波依舊暖融融

又

褚祿

天然形勝待潮生鞞鼓逢逢望欲驚正是桃花春破浪儼  
然瀛島兩翻城當時竊國悲浮瘴此日長年認盪纓競說

王師平寇日海門如雪勢崢嶸

又

臺防司馬張若靄

春媚潮偏怒兼天截地來望迷烏鬼渡幻作白龍堆風勁  
千層立門雄萬古開正疑纓失盪旋起復旋回

又

董天工

春潮春長水連天鹿耳門高湧萬千拍碎冰壺搖岳瀆噴  
開白雪浸坤乾風吹浪蹙龍鱗皴鼉吼波洄虎眼漩極目  
飛帆何處進鐵礁標插盪纓穿

雞籠積雪

高拱乾



北去二千里寒峰天外橫長年紺雪在半夜碧雞鳴翠共  
峩眉積炎消瘴海清丹爐和石煉漫擬玉梯行

又

莊年

迴殊漠北子卿身六出何來伴雁臣排闥一峯疑砌玉凝  
眸幾點恍堆銀炎方特為開生面羈宦渾如遇故人金碧  
山川都看盡礮頭畫稿覺翻新

又

褚祿

移來瓊島是何年積素凝華入望妍瑞數碧雞開運會城  
依元圃說桑田玉山岑峩光相映銀海波濤勢欲連不信

炎方寒起粟燕雲迢迢近中天

又

張若霽

翠靄渾無色凌虛絳雪橫空山寒霧集茅屋凍雞鳴海窅  
銀花合天高玉柱清丹崖縹緲外素影傍人行

又

董天工

遠望高峰疊翠增飛花六出照空凌光搖銀海三千界寒  
聳玉樓十二層排闥山椒渾是壁倒懸樹杪却非冰山陰  
王子如乘興應去扁舟騎鳳騰

東坡咏雪詩鷺毛垂  
馬駿自怪騎白鳳

東溟曉日

高拱乾



海上看朝日山間聽曉鐘天開無際色人在最高峰紫閣  
催粧鏡咸池駭浴龍風流靈運句灼灼照芙蓉

又

莊年

尾間東洩浩無邊初旭俄將黑霧穿幾度欲升猶半隱須  
臾一躍似空懸潛銷蜃氣金光燦倒射鯨波血色鮮自是  
中天多瑞彩蟄龍寧敢抱珠眠

又

董天工

朱明淑郁耀清穹賜谷生暉彩始紅燦燦金輪升碧海炎  
炎紫電閃蒼空雲間五色晨曦照天際重離曉氣融地極

東溟窺日出殷然萬國慶來同

西嶼落霞

高拱乾

孤嶼澎湖近晴霞返照時秋高移絳樹海晏捲朱旗孫楚  
城頭賦劉郎江上詩淋漓五彩筆直欲補天虧

又

莊年

殘照無多日漸沉餘霞散綺滿西岑不隨孤鷺飛江渚偏  
逐歸鴉落樹林斜度微雲千片玉淡依新月一鉤金欲餐  
自愧慚中散執掌風塵思不禁

又

董天工



雲錦斜帔暮色低千絲萬縷繞峰西朱光照水驚孤鶩綠  
綺經天吐彩霓朴子漫思滋氣飲魏髮恐作曉妝迷霏霏  
郁郁真堪賞拭目丹輝倚檻睇

澄臺觀海

巡臺御史六十七

層臺爽氣豁雙眸遠望滄溟萬頃收赤霧啣將紅日暮銀  
濤拍破碧雲秋鷗鵬飛擊三千水島嶼平堆十二樓極目  
神州渺無際東南形勝此間浮

又

高拱乾

有懷同海濶無事得臺高瓜憶安期棗山驅太白鰲鴻濛

歸紫貝腥穢滌紅毛濟涉平生意何辭舟楫勞

又

莊年

簿書笥束苦相纏乘興登臺意豁然烟靄光中三面水晴  
雲影裏四垂天瀰茫境界憑欄外浩蕩滄溟落照前極目  
波濤渺無際笑他精衛若何填

又

張若霽

聳立憑欄蕩遠眸海天一碧望中收鯨魚潛伏三千浪鵬  
鳥高搏九萬秋極目無情逢幻市近山有意覓瓊樓會當  
上獻安期棗看取滄溟瑞色浮



又

陸廣霖

煙波縹緲水漫漫高閣登臨面面寒收拾崑崙千派合劃  
開江漢四圍寬塵氛不向壘靈發壘靈鼻神字見黃庭經寰宇全歸  
掌握看憑眺頓教心地遠擬將浩瀚寫毫端

又

董天工

洪源萬里畫滄洲綺閣憑臨極目收遙望東溟天與共轉  
窺西嶼地隨流波澄似覺乾坤浸浪湧還看日月浮緬想  
登州蘇太守蜃樓不見恨悠悠

斐亭聽濤

高拱乾

島居多異類大半是濤鳴試向竹亭聽全非松閣聲人傳  
滄海嘯客訝不周傾消夏清談倦如驅百萬兵

又

莊年

纔聽朝潮又暮潮怒濤聲裏竹蕭蕭千竿不藉風搖曳萬  
弩何當影寂寥豈必林泉甘漱石却因烟月憶吹簫星纏  
舊是揚州路流水應過廿四橋

又

諸羅林 茨

曾趨官閣待春潮笑語渾疑燕蓼蕭乍聽怒濤雲浩浩還  
看良月夜寥寥早知沙上無寒鴈可有仙人倚洞簫此日



瀛壖成夢想天邊誰與度銀橋

又

陸廣霖

踈影蕭蕭萬籟平江亭忽聽怒濤鳴  
尔疑簷角風敲玉頓覺叢中浪拍城  
島嶼波洄憑竹報篔簹聲寂待潮生  
遠臣仰沐澄清久跨海鯨鯢靜不驚

又

董天工

何處波聲入耳盈江亭忽若聽雷鳴  
千般隱隱敲寒玉百轉洶洶擊曉箏  
雅韻疑從蕭竹響淒音莫辨怒潮生  
直應浪靜風恬後始識馮夷奏鳳笙

裸人叢笑篇

臺灣司馬孫元衡

皇威懾音讐服也海若崩角革頑凶昔從倭鬼役今為王者農  
酋長加以冠族類裸其躬震驚鞭撻威嬉戲刀劒鋒臺即  
出守羅星宿云是大唐王與公五十二區山百重南極蜈  
蟻北雞籠渾沌不鑿天年終

衛鬢

音壤亂髮

縵靡草

音霽束髮

髻

音搨括髮

如植竿獨竦兕廡立兩

岐獬角端不簪亦不弁雜卉翼以翰謂當祝髮從甌駱

越駱爾胡不髡能自完鑿困貫竹皮括輪象日月兮衛其身

圓景雙擔任也色若銀我聞無腸之東聶耳國趨走捧持



猶捧珍又云一耳爲衾一爲茵非其苗裔強相效嗚呼坎  
德胡不辰

齒耳夫何以皓爲又奚取於漬汁而漆頤厲骨辟穢芳其  
脂墨氏毋寧悲染絲

倒懸覆臙如繫羶羊織竹爲笊同籩約肚束腸行犇登躍食  
少力强蜂壺猿臂逐鹿踰岡將刀斷之挽手上堂爲語楚  
宮休餓死盍習此術媚其王

短布無長縫尚元戒施縞桶袞本陋製不異蠻犵狁蠻犵狁也  
蠻鑿齒喪其親爾蠻鑿齒媾其姻雜俗殊風仁不仁

管承鼻息颺簫音筠亞齒隙調琴心女兒別居椰子林雄

鳴雌和終凡禽不顧耶娘回面哭生男贅婦老而獨但知

生女爲門楣高者爲山下者谷猫女膩新相關妍醉歌跳

舞驚鴻翩首長朝來易版籍東家麻達西家仙麻達既

接飛軼走縱行橫施繡肌雕腋勇者是儀龜文蟬翼蒙表

貫肢背展鷗鶚胸獐豹螭跳脫臂鈇音翰瓔珞頂披蠢然

身首犁醜尸小人國有神人面

海山宜鹿依於樸椒麇麇吻吻羣行野伏諸番即之長鉞

也箭勁箴毒柵音訕橫噬倍於殺戮憑藉商手賦公局獲車



既傾壑有慾彊音薑白牛犇犸音榻食何苦辛直朶頤於刑蹄而剖腹

爾之生也懸刀代弧爾之壯也畜犬為徒柔筌取魚器以卧肉以舖縱橫猛氣凌殷虞奮狝音銀兩犬爭也音寅狝音力不

可呼爭先奚翅當百夫功多齒鈍棄匪辜日暮纍纍嗥路隅

虎山可深入傀儡難暫逢不競人肉競人首殲首委肉於狃縱驚禽飛駭獸走腰下血模糊諸番起相壽

崩泉下澗三尺波女兒汲水如羣鷺中官投藥山之阿至

今仙氣留雲窩生男洗滌意非宅無孿無靡無沉痾他日縱浪有勳業為鯨為鯉為蛟鼉

鼉鼓轟林人野哭舉屍炊炙睇以燠蠅蚋不敢侵螻蟻漫相逐埋骨無期兩頰屋安置鬼牛與鬼鹿鬼殘日夜傷幽

獨番死鳴鼓而哭火炙令乾露置屋中屋傾而後掩所遺皆稱鬼物無敢取者號其婦為鬼殘眾共棄之

金人竄伏來海濱五世十世為天民花開省識唐虞春阡陌雜作如無人披草戴笠鉗口合唇道路以目爰契天真

華人侮之默不嗔秫粒如豆萁如薪羣爵玉英粲醴醕番婦爵為氤氲屏五齊三事而狄康不



聞準身準口量餘粟一榼一瓢萬事足虫虫者無懷古民  
白刃酣交醒齧棘

臺江雜味

保昌家十八兄以滇昌雜味詩十二首見示次韻却寄

巡臺范咸

慚愧先鞭早識途中即強仕亦非迂使星民社分三事地

北天南各一區家十七兄奉職夙期書竹帛哦詩好共紀

輿圖乘槎吾占瀛壖美海上三山異兩都

茫茫滄海一扁舟隱約星羅西嶼頭山仄遠迷烏鬼渡浪

高齊拍赤嵌樓笑他草竊成何事冠絕平生是此游莫向

窮鄉辨稊米中原如髮十三州

雞籠島外近伽佗色相俱空逸興蹉沙起魚龍紅日暝山

號神鬼黑風過腥涎吞鹿傳脩蟒鐵甲成船認舊螺東嶽廟後

有舊螺殼大如船惟有官衙瀟灑甚竹蕉常聽雨聲多

百年島嶼又重開可有伊人在溯洄花氣長留月下草下

香春風還發午時梅午開客窓詩苦愁遺老沈文開有客

澁小院蘭香愛逸才孫元衡有小院憑弔墜樓爭死節田

橫墓外起荒堆

占風小草宛如莫官廨粗營有綠廳園地慣收百日赤稻名



林間無改四時青聲呼晴雨籠中鳥語學味噶海上伶最  
怪香燈誇七夕三家村裏祀奎星

百錢猶自懶傭工只愛兒童賤老翁長袖紅裙爭執蓋婦

出必短衣烏布未須縫番黎短鳴蟬早咽先秋露落鴈空

傳橫笛風底事黃雲彌四野埤圳成甲不論弓田論甲

繞籬刺竹插天青小草幽花未有名冷食裸人占夏雨祈

雨不水田黎婦盡春耕耕多插秧鳥語知聲吉懸穗禾間

徧室盈風起簫琴綠底急破瓜嬌女倍多情

解讀周南第一篇更加鑿齒締良緣花叢並蒂誇三友草

繡雙紋弄七絃七絃草珍重耳邊消息到消息生憐額上

畫眉煎畫眉難窮物理裁新語瘴雨蠻烟別有天

到處都城綠玉村珊瑚無葉儘疑真臺有綠十園萌蘖生

如笋楠初生百歲良材爨作薪問俗尚期通譯語采詩未

敢笑前人齊諧志怪吾能憶草木蟲魚次第陳

漁舟歷亂曉燈紅久狎波濤不畏風結網縛粵輸課易隨

潮滬箔取魚同縛粵滬箔怪他新婦脂如玉無那鸚哥首

已童新婦鸚哥蟬蠟紛紛收不得監州好作信天翁

柑子甜過橘柚瓠西瓜元日得新嘗因耽蕉果能清肺酷



愛番榴是別腸辨味誰能輸荔子解饑人只食檳榔西方  
移得波羅蜜又種菩提菩提果名間佛桑

貝多籬畔雪如堆又見優曇花信催不向中原爭艷去却  
依荒島避人來求仙敢問長生事化俗還期治世才寄語  
海南勾漏令丹砂莫載舩船回

再登臺江雜咏原韻十二首

瀾茫徼外關窮途飛渡橫洋計不迂瀆瀆自來甌脫地屏  
藩藉此彈丸區靈槎好繫扶桑木赤石誰傳瀛海圖千樹  
刺桐紅似火錦官直欲擬成都

汗漫真成不繫舟連檣還裏片帆頭遠瞻砂馬磯邊石近  
眺澄臺海上樓雲日有情隨我住鯤鯪未辨悔空游劇憐  
春瘴迷人目清夢何從覓九州

西天小寺禮彌陀郡有小西天寺偽鄭園亭日漸蹉悉改銅礮風

雷金甲動鄭成功見水底有光上騰鯨魚冠帶海門過鄭

功攻臺時紅毛先望見一人冠帶騎鯨虎鯨夜集貪牽罟

從鹿耳門入成功諸舟隨由是港以進魚名鸚武朝遊寄負螺名鸚武堪笑揭竿稱鴨母空嗤海外

夜郎多朱一貴素飼鴨土人稱為鴨母

密雲狂吼幾時開鼉鼓逢逢潮汐沙洄沙線兩條翻白浪颿



風六月作黃梅樓船出水憑颿疾犀甲摧人藉將才惆悵

鮫宮經百戰忠臣血濺白沙堆

謂辛丑變

朝潮盈縮視堯莫榕樹垂條刺史廳

郡署內有榕橋

春雨獨添鐵

線白鐵線橋名秋山無過木岡青

木岡山名

絃歌比戶皆蠻語優孟

登場半粵伶欲望長安愁日遠夜涼徙倚太微星

含沙誰謂射人工登陸先機兆海翁

海翁魚之大者鄭氏將滅前有魚長四五

丈鳴聲鳴深賴子牙還自刺尤憐尺布未能縫

施原與偽鄭同事後

以施攻鄭經孽子欽舍天心但測淺深水

鄭氏滅荷蘭王師滅鄭氏平

朱一貴鹿耳地利全資順逆風此日

聖朝聲教遠軍容整暇不張弓

土田不糞便滋榮百穀從教未識名一雨似秋三節夏四

時皆獲半年耕人非土著翻成庶食有餘糧到處盈却恨

擣蒲成夙疾竊花兒女說風情

臺俗未字女元旦竊花枝謂得佳婿

不信幽風蟋蟀篇雪霜冰霰了無緣潮雞夜半已先唱月

魄莫稀便上絃金穴玉山那可到湯泉硫井轉相煎最奇

暗澳花如海纜至新秋薄暮天

暗澳春夏百花爛熳秋冬即如長夜

零丁避世有遺民

零丁洋之敗宋人遁亡至此

重譯還疑似女真山上

蠟房成澤國洞中橋樹爛樵薪鹿場漸已除荒埔蟒甲於



今度漢人鱗甲獨木舟也底事穴居同一室僅分絳席夜橫陳

繁花多半是深紅有色無香謝曉風倒挂終嫌與物異掛

鳥含羞却似向人同含羞草名蛋烟蠻雨憐猫女狐帶鶉衣怪

狡童賴有松醪風味足玉山頽處醉衰翁

鳳尾黃梨間白瓢連林槎子共分嘗生憐香醉即官舌支荔

有名即牽惹情多御史腸辟瘴定須藏惹苴拂塵聊且縛

椽柳椽柳樹可為帚蓬麻茜草能成錦何必田園定種桑

佳葩異卉繡如堆詩欲成時景又催絳羽鸚哥頻自舞刺

一名鸚哥花金絲蝴蝶忽飛來金絲蝴蝶亦花名九重溪外求田好七

里香中作賦才思力敢誇猶未竭天風還鼓海濤回

三疊臺江雜咏原韻十二首

方丈瀛洲孰問途童男艸女計真迂難從縹緲尋三島纔

望滄溟笑具區志怪惜無觀海賦陳詩賴有采風圖六巡方著

簡書不見依依柳只合中原占麗都

小豆稀微認海舟東坡登蓬萊閣望海舟似黑豆數點淵渟靜綠到城頭緣

篷上下憑桅脚望向東西倚柁樓十斛夜珠波上度一天

雲漢月中游鼠橋虎尾從頭數不惜千金檄廣州廣南產烏桅

蟠螭光怪起陂陀鷺門古磚箕服成謠竟不蹉拍水早占



猗鼠起登山還信蟄龍過

朱子登鼓山占地脉

赤眉銅馬泥中蠖滄

海桑田指上螺怪得清泉轟烈火

水泉長出火

飛廉暴駭涸鱗

多

四時花並一時開冬日池荷清淺洄儘放顛狂偏愛菊不

隨寒暖却輸梅笑他作客無愁思何用悲秋仰大才照殿

深紅渾不謝朝華山下錦成堆

鳳山有朝華離山

改歲無從問落莫于茅添竹結莎廳矮牆漏日虛窓白叢

樹連陰曲檻青被髮文身尊粵尉裸衣埋骨學劉伶漆頤

便自誇年少難染絲絲兩鬢星

甌爨人人備百工生男贅婦不知翁束腸約肚足爭捷緝  
苧編茆手自縫宿樹隱藏狐兔窟驚沙奔及馬牛風髑髏  
高奉羣相壽野伏長鉞恃竹弓

繁英的的遶南榮花信風來孰主名冬夜還疑輸夏日秋

淋何事轉春耕地瓜生處成滋蔓

番薯一名地瓜

土豆收時祝滿

盈

花生一名土豆

更有蔗漿通市舶羈縻應鑒遠人情

懷柔頻誦

典謨篇省識黃農與古緣象物已新皇夏鼎

阜財更拂有虞絃中官投藥泉猶潔

明太監王三保投藥水中

狂虜游

蒐膏自煎極目雲山多北向彩霞深處是中天



無懷信是葛天民，獐豹當胸未似真。出草捕鹿也攻圍先用

火采藤伐木，豈抽薪舊痕。貫竹塗金釧，新浴臨溪愛玉人。

番婦晚浴於溪為看渺綿飛彩鳳，鞞鞞戲曰渺綿靚粧可厭綺羅陳。

椎髻圍花一色紅，尤憐雉尾晚搖風。也諳禮讓非關學，纔

讀詩書便不同。大耳祇因娛美婦，番婦喜大耳番細腰未許過成

童。成婚後即不箍腰笑他女作門楣好，真個吾翁即若翁。長日

柳子中堅不作瓢，天生美醞得分嘗。綠筠已覩觀音面，音觀

竹翠蟬終無公子腸。粉壁握椒焚牡蠣，管城脫穎貯桃柳。

桃柳可為筆筒難烹却怪逢蚰蟬，蚰蟬龜屬大者百勛博物應知又累桑。

木城環拂綠雲堆，二月寒蟬聲已催。北塞罕傳鴻信至，南

荒終少鵲飛來。臺無鴈與鵲銷磨劫火培元氣，鼓吹勾萌養不

才。但使巡行阡陌好，中天日月自昭回。

即事偶成二律

六十七

微茫島嶼片雲孤，物產民風事事殊。絕好饔飧紅脚早，天

然籬落綠珊瑚。花無寒燠隨時發，酒長瓊漿不用沽。最是

良疇耕鑿易，欣然醉飽樂唐虞。

飽啖檳榔未是貧，無分妍醜盡朱唇。頗嫌水族名新婦，却

愛山蕉號美人。劇演南腔聲調澁，星移北斗牛女真。生憎



身圖錄 卷四  
負販猶羅綺何術民風使大淳

臺灣近咏十首呈巡使黃玉圃先生

原臺鎮幕友  
任廣州太守藍鼎元 漳浦人

東寧大海荒從古無人至明末羣盜窠島竊互竊踞鄭氏  
奄而有蔓延爲邊忌我

皇捷伐張天威及魍魅遂使瘴癘鄉文物漸昌熾川原靈秀

開鬱勃不可閉式廓惟日增蹙縮非長計

時有議棄近山  
田廬禁入番界

樵所當順自然疆理以時議勿因去歲亂畏噎却飯饑

去歲羣醜張揭竿三十萬我旅一東征倒戈雲見睨七日

復全臺壺簞匝地獻可知

帝德深望雲半革面餘孽雖時有死灰謀欲煽旋起即撲除  
夫誰與爲叛當茲振道鐸教化不容緩民心原猶水東西  
流乍變棄之鋌而走理之忠以勸

臺俗敝豪奢亂後風猶昨宴會中人產衣裘貴戚愕農情  
士弗勤逐末趨驕惡囂陵多健訟空際見樓閣無賤復無  
貴相將事擗博所當禁制嚴威信同鋒鐔勿謂我言迂中  
心細忖度爲火莫爲水救時之良藥

閩學追鄒魯東寧昧如障當爲延名儒來茲開絳帳俾知



身置錄 卷四  
道在邇尊君與親上子孝及父慈友恭更廉讓從茲果力行誘掖端趨向其次論文章經史爲醞釀古作秦漢前八家當醢醬制義本儒先理明氣欲王洗伐去皮毛大雅是宗匠此地文風靡起衰亦所望  
臺地一年耕可餘七年食寇亂繼風災民間更蕭索今歲大有秋倉儲補云急穀貴慮民饑穀賤農亦惻厲禁久不弛乃利於奸墨徒有過糴名其實竟何益估客旣空歸裏足此寡寂何如樽節之一艘一百石窮年移不盡農商惠我德幸與諸當途從長一籌畫

纍纍何爲者西來偷渡人銀鐺雜貫索一隊一酸辛嗟汝爲饑驅謂茲原隰昫舟子任無咎拮据買要津寧知是偷渡登岸禍及身可恨在舟子殛死不足云汝道經鷺島稽察司馬門司馬有印照一紙爲良民汝愚乃至斯我欲淚沾巾哀哉此厲禁犯者仍頻頻奸徒畏盤詰持照竟莫嘆茲法果息奸雖寬亦宜勤如其或未必寧施法外仁

臺邑最褊小徵糧視鳳諸土狹賦獨重民困曷以紓臺灣田一甲內地十畝餘甲租八九石畝銀一錢輸將銀來比粟相去竟何如納粟弊多端斗斛交相瘡折色比時價加



倍復何居鳳諸雖厚歛什百臺版圖墾多或報少以羨補  
不敷臺土瘠無曠衝壓且偏枯安得相均勻丈輕三邑俱  
征收同內地含哺樂只且

郡東萬山裏形勝羅漢門其內開平曠可容數十村雄踞  
通南北奸宄往來頻近以逋逃藪議棄爲荆榛此地田土  
饒山木利斧斤移民遷產宅兵之亦斷斷何如設屯戍守  
備爲遊巡左拊岡山背右塞大武賢既清逸賊窟亦靖野  
番氛府治得屏障相需若齒唇

諸羅千里縣內地一省同萬山倚天險諸港大海通廣野  
渾無際民番各喁喁上呼下即應往返彌月終不爲分縣  
理其患將無窮南劃虎尾溪北踞大雞籠設令居半線更  
添遊守戎健卒足一千分汎扼要衝臺北不空虚全郡勢  
自雄晏海此上策猶豫誤乃公

臺灣雖絕島半壁爲藩籬沿海六七省口岸密相依臺安  
一方樂臺動天下疑未雨不綢繆侮予適噬臍或云海外  
地無令人民滋有土此有人氣運不可羈民弱盜將據盜  
起番亦悲荷蘭與日本眈眈共朶頤王者大無外何畏此  
繁虫政教消頗僻千年拱京師



東征逾載整棹言歸巡使黃玉圃先生索臺灣近咏  
知其留心海國志在經綸非徒廣覽土風娛詞翰  
已也賦此奉教五首  
藍鼎元

盛夏我將去先生繡斧來欲觀君子化以茲暫徘徊邂逅  
若疇昔雄談何快哉清風彌島嶼百辟式丰裁其如困羽  
檄不得日追陪我今整歸棹過從無嫌猜所念經營者先  
事去禍胎願言一爲別幸無忽草萊

番黎素無知渾噩近太古祇爲巧僞引訟爭亦肆侮睚眦  
動殺機其心將莫禦所幸弗聯屬社社自愚魯太上用夏

變衣冠與居處使彼忘爲番齊民消黨羽其次俾畏威罔  
敢生乖迕無虐無令傲服勞安作苦恩勝即亂階煦噓鼠  
爲虎所以王道平不爲矯枉補

內山有生番可以漸而熟王化棄不收獷悍若野鹿穿箐  
截人首飾金誇其族自古以爲常近者乃更酷我民則何  
辜晨樵夕弗復不庭宜有征振威寧百谷土闢聽民趨番  
馴賦亦足如何計退避畫疆俾肆毒附界總爲戕將避及  
床褥

鳳山東南境有地曰瑯嶠厥澳通舟楫山後接崇爻寬曠



兼沃衍氣勢亦雄驍茲土百年後作邑不須魚近以險阻  
棄絕人長蓬蒿利在曷可絕番黎若相招不為民所宅將  
為賊所巢遐荒莫過問嘯聚藏鷗梟何如分汎弁戎備一  
方遙行古屯田策令彼伏莽消

天子重海邦宵旰念重洋稔知民疾苦經營固巖疆先生  
代巡守曠典豈尋常勿虛此行行使命乃有光賤子雖不  
才躬踐戎馬場居東將二載所見頗周詳曾將前箸借孽  
醜俘且僵承索臺灣咏草此留別章狂言失忌諱意念則  
深長蕘採檄有司白簡上朝堂救寧紀功德山水並蒼泱

咏偽鄭逸事四首

候官陳昂  
諸生

戰屻旋師返北轅轉教航海闢乾坤金多舊借牛皮地水  
漲新通鹿耳門赤嵌城孤遺舊業紅夷援絕竟移屯何緣  
自比虬髯客豈昧幾先讓太原

片石能容百萬人天遺圖讖應南閩也知中國全歸漢妄  
托仙源可避秦荒島畬田登版籍土酋番族雜流民開荒  
絕勝田橫島易世相傳尚不臣

荒遠羈棲幸弗誅敢通叛逆約齊驅漫勞蝸戰爭天下先  
自鯨吞奪海隅三載相持誰得利兩雄交構待全輸彼蒼



藉手平南紀曠古新增一統圖

耿逆變後使人詣經請濟師經欲借漳泉  
二郡為召募地耿逆弗許自是戰爭不息

昔年亡將濟時才仰仗威靈涉險來地轉海鹹生淡水天  
回風颶起奔雷官軍血戰滄波沸逆虜魂銷劫火灰澳嶼  
全收三十六受降澎島戟門開

臺海竹枝詞八首

仁和 郁永河 諸生

鐵板沙連到七鯤鯤身激浪海天昏任教巨舶難輕犯天  
險生成鹿耳門

雪浪排空小艇橫紅毛城勢獨崢嶸渡頭更上牛車坐日

暮還過赤嵌城

編竹為垣取次增衙齋清暇冷如水風聲撼醒三更夢帳  
底斜穿遠浦燈

耳畔時聞軋軋聲牛車乘月夜中行夢回幾度疑吹角更  
有牀頭蠅蚩鳴

蔗田萬頃碧萋萋一望龍葱路欲迷細載都來糖廨裡只  
留蔗葉飼羣犀

青葱大葉似枇杷臃腫枝頭著白花看到花心黃欲滴家  
家一樹倚籬笆



身聞錄 卷四  
肩披鬢髮耳垂璫粉面朱唇似女郎媽祖宮前鑼鼓鬧  
啞唱出下南腔

臺灣西向俯汪洋東望層巒千里長一片平沙皆沃土誰  
爲長慮教耕桑

土番竹枝詞十首

郁永河

生來曾不識衣衫裸體年年耐歲寒犢鼻也知難免俗烏  
青三尺是圍圍

文身舊俗是雕青背上盤旋鳥翼形一變又爲文豹鞞蛇  
神牛鬼共猙獰

胸背爛斑直到腰爭誇錯錦勝鮫綃冰肌玉腕都文遍只  
有雙蛾不解描

丫髻三叉似幼童髮根偏愛繫紅絨出門又插文禽尾陌  
上飄飄各鬪風

覆額齊眉繞亂莎不分男女似頭陀晚來女伴臨溪浴一  
隊鷓鴣漾綠波

耕田鑿井自艱辛緩急何曾叩比隣構屋斲輪還結網百  
工俱備一人身

夫攜弓矢婦鋤耰無褐無衣不解愁番罽一圍聊蔽體雨



來還有鹿皮兜

莽葛元來是小舸剗將獨木似浮瓢月明海溼歌如沸知

是番兒夜弄潮

梨園敝服盡蒙茸男女無分只尚紅或曳朱襦或半臂土

官氣象已從容

土番舌上掉都盧對酒歡呼打刺酥聞說金亡避元難颺

風吹到始謀居

紅夷劍歌

孫元衡

海潮迅復千丈波寶劍出匣悲風多劍身三尺菖蒲葉文

成蝌蚪星辰羅耿耿光明拖疋練潢潢氣勢翻長河繞膝

柔如弓抱月鐔然脫手鏘鳴珂壯士斫石迸陰火應聲解

物無延俄寒燈照夜老蛟泣冷雨入屋神龍歌長鬚遺民

向我說兒時喪亂淪於倭長歷荷蘭諸絕國酷嗜長劍情

靡他番禁例同盜神器得此逋竄遭蹉跎渡海中流鬼物

奪雷公電母頻攜訶歸向中原廼拂拭照見頭髮霜為皤

良工導我開生面千金裝飾十年磨佩之邪心除已盡世

人不敢輕摩挲我有墨兵久不用覩此神物心平和願見

聖人舞干羽喜逢宇內銷兵戈遺民掀髯發長嘯太平對



此將如何萬事不平今已矣掉頭蹈海雙滂沱

海吼歌

孫元衡

我聞百物噫恚鳴穹蒼而何有於百谷之王幽隘搏擊成  
聲光而何有於祝融之汪云胡吼怒彌晝夜震撼鮫室喧  
龍堂延聽千聲無遠近氣沴風屯海爲運窮天拘忿悲莫  
伸死地埋憂思欲奮初時起類漁陽搥七鯤噴沫開谿訝  
繁響漸臻有噓喻萬蹄按轡行虛沙倏如戰勝轟千軸刮  
乾戾坤爲起伏灘以山摧熊虎號砰磕成雷魔母哭山摧  
石爛如寒灰雷震翻空偶馳逐爾乃十日五日吼不休使

我耳聾心蠢蠢或言訇哮由積風掛席長梢凝碧空或言  
狂潮本瀾汗進則剽沙礮石爭來攻退則餘波呀呬殿成  
功爲魁爲窟奔海童朝夕池邊歷歲月去來喧寂將毋同  
老農又言徵在雨黑螭隱見青鼉舞叫嘯年來徹霄漢炎  
威千里成焦土泱泱海若大難名我欲問之阻長鯨水德  
懦弱懼民玩庶幾赫怒張竒兵大賢崇實戒虛聲股肱之  
喜良非輕

颶風歌

孫元衡

九瀛怪事生微茫瘴母含胎颶母長虹蓬出水勢傾墮雲



車翼日爭迴翔須彌山下風輪張獰悍燦怒天爲盲埵然  
於扶桑之木末吞吐夫天地之巨洋旬哮簸蕩鼓神力不  
崇朝而周迴於裸人之絕國黑齒之窮鄉颺颺颺颺無不  
有一一塚掘塵飛揚突如神兵交萬馬崩若秦家天地瓦  
颺颺起中央沙礫盡颺灑鼇身顛顛拄坤軸羲轂軒軒欲  
回輒怒鯨張齒鵬奮飛涸鱗陸死鹽田肥嗟哉元龜入殼  
避武威伏蟲盡蹂躪植物將誰依東門大鳥何時歸我聞  
山頭磐石墜海水夔鼓轟騰五百里戰舸連檣吹上山垂  
龍罔象迫遷徙萬人牽之返於泚嗚呼海田幻化良如此

又有麒麟之颺火爲妖颺颺燐燐如焚燒黃髮遺民一再  
見闔門堅壁逃蒸焯青青者黃黃者黑死海破塊山枯焦  
飛廉狂癡肆其虐祝融表裏夫誰要帝天不下聽仰首空  
雲霄舉筆用紀其事爲長謠昨者估客歸爲言落滌事遭  
此四面風溯滂無由避連山波合遠埋空湧嶂劃開驚裂  
地木龍冥鬱叫幽泉桅不勝帆柁出位閃閃異物來告凶  
鬼蝶千羣下窺伺赤蛇逆浪掉兩頭白鳥掠人鼓雙翅天  
妃神杖椎老蛟攘臂登檣叱魔崇事急矣划水求仙披髮  
執箸虛搖船牛馬其身蹄其手口銜珠勒加鞍韉雷霆一



震黃麻宣金雞放赦天所憐扶歌盡伏六丁力中原一髮  
投蒼煙芒刺在背鉗在口自量歸渡霜盈顛爲舉一杯酌  
南斗胡爲乎職司喉舌而箕張其口聖人御極不鳴條噫  
此厲氣焉能久雄兮雌兮理則均強爲區別楚人徂花信  
何妨廿有四扶搖不礙萬盈九動物神功齊雨暘南風薰  
兮愠何有願箕察所好剛柔用其中戢威自艾安爾宮三  
年不波萬國來同吾將槎乘貫月歷四荒八極徜徉而東

赤瓦歌

有序

范咸

臺屋瓦皆赤下至牆垣階砌無不紅者此赤嵌城  
所由名也余乃爲作赤瓦歌

絳雲火繖張海國燒空滅盡青銅色信知天運應炎方搏  
土何緣變髹漆萬室於今陶者誰煬竈渾疑欺白日連椽  
櫛比紛參差畫棟朱甍幾回惑漢家黃屋禁例嚴風剝雨  
淋遮不得臨漳銅雀更何似香姜舊款無人識况兼四壁  
光炯炯環堵恍與宮牆逼簾前磚影更輝煌彤墀彩繪盈  
階城華芬儼上祝融峯珠煤貫屋祥光直千門萬戶火西  
馳照耀燭龍烏戢翼我思天台有赤城朱霞天半稱奇特  
又聞南方裔外山赤石爲牆標異域此間合是虹霓居義  
轂軒軒火鞭扶六丁叱馭驅蛟螭故發狂飈銷鬼蜮君不



見火焰山頭半焦土燐燐如焚少荆棘又不見煥翻地底  
硫磺山草楛海破飛烟黑麒麟之颺吹繁星流金燦石鯨  
鯢息溫泉轉作瘴母胎裂竅烘池土花施刺桐萬朵吐紅  
絲驀地燒天怪繁殖扶桑照殿逞鮮妍艷艷網緼錦交織  
海若自來足光怪丹邱浴日鎔金靄蒸鬱恒暘陽用九司  
天南正神明力十八重溪水瀟騰九十九峯山崩劣魯陽  
揮戈勢當逐巫尪自焚尤應殛炬牛燧象爛功勲庶幾赫  
怒彰天德祗今海宴無烽塵不煩煨煉洪爐側承平但願  
風雨調永息炎威靜八極

番曲

大傑巔社祝年歌

臨臨其斗寅

今年過

尋唧唶什剝格唶圭甲

為粉資殺雞

施里西

奇文林

祭天地

匏打鄰其斗寅麻亮其斗寅

祝新年勝去年

嗒學嘎

葛唶啞因

倍收穫食不盡

新港社別婦歌

馬無艾幾唶

我愛汝美貌

哨無晃米啐

不能忘

加麻無知各交

實實

想

麻各巴圭里文蘭彌勞

我今去捕鹿

查美狡呵呵字沉沉

無晃米啐

心中輾轉愈不能忘

奚如直落圭哩其文蘭

待捕鹿

查下力



柔下麻勾回來便相贈

武洛社頌祖歌

嘻呵浩孩耶嘎此句係起曲之調也連糾先時節鎮喇烏留岐跌哪  
我祖先能敵愧那喇平奇腰眉聞風可畏鎮仔奇腰眉如今愧耳  
奄耳罩散嘎不敢侵越我界

下淡水社頌祖歌

巴干拉呀拉呀留請爾等坐聽礁眉啞啞漢連多羅我洛論我祖先  
如同礁眉呵干洛呵連凡行走必在前呵吱媽描歪呵連刀何等英雄  
啞嗎礁卓舉呀連呵吱嗎如今我輩子孫不肖無羅嘎連如風隨舞巴干

拉呀拉呀留請爾等坐聽

上淡水社力田歌

咳呵呵里慢里慢那毛呵埋此時係耕田之候 啞啞老啞描嘎咳  
天今下雨 啞吧伊加圭朗烟及時耕種 啞麻列啞呵女門下秧 啞描  
螺螺嘎連好雨節次來了 啞麻萬列其嘻列插田明白好來飲酒

力力社飲酒捕鹿歌

文嘜啞啞奢來賽戲 丹領啞漫漫種了薑 排裏啞黎唉去換糯米  
弄啞嘜力來釀酒 麻骨裏啞嘜力釀成好酒 匏黍其麻因刃臨萬  
啞嘜力請土官來飲酒 媽良啞嘜力酒足後 毛丙力啞文蘭去捕鹿



里居琪丙力捕鹿文嘮琪啞奢復來

瑯嶠社待客歌

立孫呵網直爾來六甲呵談眉談眉此處不那鬼呵網直

務昌哩呵朗耶爾來無佳嗎踈嗎踈得罪

麻豆社思春歌

唉加安呂燕夜間音那馬無力圭吱腰從前嗎圭

礁勞音毛噉我昨夜沒生交耶音毛夫今尋至孩如未生

吱連心中歡

諸羅山社豐年歌

麻然玲麻什勞林今逢豐蠻南無假思毛者會約宇烈然

喚沙無嘎却須釀宇烈嘮來奴毛沙喝嘻齊來麻什描然

麻什什願明年還

打描社番童夜遊歌

麻呵那乃留咧化呢我想汝麻什緊吁啐化我實心化散

務那乃啐麻汝如何麻夏劉啐因那思呂流麻我今回家

我贈

斗六門社娶妻自誦歌

夜描拔屢描下女今日我別言毛哈啣呼請來尤啣描啣



林尤林日後我生子孫由拔屢別言毛哈唧呼再娶妻又請來飲酒

東西螺社度年歌

吧園吧達叙每鄰無那耕田馬流平耶珍那麻留呵嗒愛

歲收夫甲嗎留文蘭捕鹿甘換麻文欣麻力易銀完餉密林嗎流

唧豪嗒含可去釀酒過年

貓霧抹社男婦會飲應答歌

爾貓呻嘆幼番請番婦先歌爾達惹巫腦番婦請幼爾貓力邁邁

由系引呂乞麻喃番曰爾婦人賢而且美爾達惹麻達馬麟嗶什格

婦曰汝男人英雄兼能捷走爾貓力邁邁符馬乞打老末鞭引奴薩番曰

汝婦人在家能養雞豕并能釀酒爾達惹達赫赫麻允倒叮文喃乞網果

嗎捕鹿曰汝男人上山能美什果孩唧嚶哩勺根嘆巫腦岐

引奴薩今眾社皆大歡喜和歌飲酒

蓬山八社情歌

沉唧嘮葉嘆賓呀離乃勞夜間聽歌聲末力吠弋達些我獨卧心悶

末里流希馬砌獨夏噫噫喃又聽鳥聲鳴想是舊人來訪達各犁目歇

馬交噯斗哩走起去看却是風吹竹聲嘆下逢寧臨律嘆噯噯噯喃呀

微總是懷人切故耳

後壠社思子歌

凡月... 番曲... 四十一



曳底高毛曰怪鳥飛去吠目吠其宰老描崙飛倦了宿在樹上末力希

呂妖見景心悶毛嘎吠嘆幽唧林嘮想起我兒子目歇吠越耶回家去看

仔者麼飲呂吠請諸親飲酒釋悶

淡水各社祭祀歌

遲晚自居留什虔請祖公遲晚眉虔請祖母街乃密乃濃爾來請爾酒街

乃密乃司買單悶爾來請爾飯共菜打梢打梢樸叻薩魯塞嘆庇佑

禾稔年年好樸叻薩魯朱馬嗜嚼嗜自東自西好收成麻查岐斯麻老

麻薩拉捕鹿亦速擒獲





